

皇朝經世文統編



論通商之益

通商之利人與我共之者也乃一孔之士輒謂通商以來西人獨享其利而害則中國受之出口土貨往往不敵進口貨之多試舉海關清冊為証上年冊報土貨出口共值銀一萬四千三百餘萬洋貨進口共值銀一萬七千一百餘萬土貨少於洋貨計銀二千七百餘萬兩通商五十餘年銀錢之流溢於外者不可勝數來日方長漏卮不塞雖使天地為爐陰陽為炭日事鼓鑄曾不足以供其消耗西國多用金鎊以金為幣而不用銀進口大条及墨西哥銀元每歲均獲重利比年西人收買黃金金價昂貴每兩計銀三十餘換在咸同時奚止三倍赤金日少已可概見噫金銀重幣也西人用金能使中國之金翔貴西人並不用銀而所造銀元通行民間奪朝廷圉法之利噫其工心計善於謀利有如此者各項貨物可類推矣通商取中國之財民間廛財置之憂而國家則增海防鉅費購辦軍火之費出洋經費為數不貲稍有違言則鐵甲兵艦連翩而至戰則餉項動逾京垓司農興仰屋之悲和則賠款多至萬萬以上傾軍務而不足國威挫損士氣摧殘通商之事畧可覩矣於是裁冠博帶之儒文學侍從之臣樞府鉅公甘盤舊學忠憤服膺耻言財利思阻其通商之源而閉關以謝客勉強從事為禍滋深嗚呼慎已夫通商之局孰為之天為之也天之所興孰能廢之而不見夫大海乎天之所以限五大洲也有輪船而五洲皆通近更盛行鐵路十里一瞬巧奪天工水陸並進無遠弗屆人力所至舟車所至皇天亦退處於無權而欲用區區亞洲之力以塞之蒼海橫流障以一丸之泥庸有濟乎西人目中國為金穴以通商為立國根本精製機器以補人工之不足在本國設立商部簡命大臣綜領其事在他邦則堅船利礮以壯之又使領事以護之資本不足則糾集公司以助之消息不靈則安設電報以捷之貨必投我所好而工細絕倫價值務從其廉而消場益廣重視商人上與王公抗禮偶宴貴賓至假御園宮殿國有戎事商任籌餉之責焉中國則不然逐末之禁載於成周賈人不得推擇為吏見於漢詔今之領度支者專以病商為務專以病本國之商為務釐卡如林稅關櫛比暴斂橫征誅求無厭而西人之貨則張目熟視而莫可誰何是豈優待友邦哉何其克己也為叢毆毬為淵毆魚挂牌洋商日多一日有異陳氏厚施之為耶說者謂此皆不重通商之過也通商之事善用之則受其利不善用之則受其害商列四民之末有國家者所不能一日無也農工為百貨所從出使非商人通其有無時其出入則農有餘粟女有餘布工積器用而不

免飢寒士之高談王道閉戶潛修者亦無以養其欲而給其求即國家泉府畸重畸輕使非商賈懋遷血脉安得流通日中為市交易而退各得其所上古之世所由均平而無憂貧弱也誠使毅然鄭重商務上無鄙薄市僧之心除病商之苛政挽已失之利權師工藝之良法廣編氓之生計則中國商務庸有乏乎且通商之利中國實隱授之人自不覺耳無論洋貨土貨成交之時大都在通商口岸猶是中國之地也經手之用錢剝運之雜費海關之稅項合而計之已抵貨價之三四皆中國食力之民之所得也雖出口貨少進口貨多似洋貨足奪中國之利而不知中國小民尚有收回之利也特散而無紀不可復核耳閩粵失業之民散而之英美各邦南洋各島者何止幾千萬人皆藉工作為生計每年各有寄回養家銀兩致為土人所惡苟非通商立約出洋謀生者當不若是之盛由此言之通商亦未始非中國之利也永保利權勿為外洋侵佔是在深明時局者

互市利弊論

孔叢子陳十義篇趙王問子順曰今寡人欲求北狄不知其所以然答曰誘之以其所利而與之通市則自至矣與之通市者以我無用之貨取其有用之物是故所以弱之也如斯不已則彝狄之用將廢於衣食矣殆可舉槌而驅之豈徒弱之而已乎賈子新書匈奴篇設五餌以壞其耳壞其目壞其口壞其腹壞其心五餌者皆中國之聲色滋味淫巧也中行說教匈奴得漢繪絮以馳草棘中衣袴皆裂以示不如旃裘之完善得漢食物皆去之以示不如酪漿之便美嗚呼此古者馭夷狄謀中國之術今乃盡反其利害而行之歲以千萬之金錢易彼毒民之鴉片甚至布帛器械飲食玩好日用所需者自上至下亦惟洋貨是趨而內地之物產不售內地之物不售而吾業民之作業匱作業匱而民日窮矣中國之金錢有限外洋之奇技淫巧無窮而外洋日富矣昔以無用之物弱夷狄者今夷狄以之而弱我昔以之壞夷狄者之耳目口腹心者今以之而自壞持此以往數十年而不變民有不窮財有不盡者乎古之言財聚民散者有聚於君上者矣有聚於貪暴之臣者矣有聚於兼井之豪者矣聚於君上有以財發身之主出可舉而大賚也聚於貪暴兼井之臣有聖君賢相可因之而利民也若聚於外洋則一往而不返雖有善者難為計矣或曰然則絕互市可乎曰何可絕也無論外洋以市為命必逞其毒以與吾相爭即吾民之役於利者而趨之殺之亦不止也北宋禁通高麗而閩浙之民犯禁而往者無窮也明初設市舶司於浙與日本市嘉靖二年廢而亂作害且遺偏東南也不知遠馭長駕之術惟知閹門坐大以求息事者庸儒之陋識不可語大計者也曰然則互市無利乎曰何為其無利也知彼知已百戰百勝敵之情形賴互市而

息事者庸儒之陋識藉以足國用者有矣百貨錢幣之盈虛得互市而流通者有矣東南人滿之患得互市而寢益者有矣昔祖狄拒石勒於河南祖逖求與通好逃不報書而聽其互市夫不與之通好尚與互市以制之況與之通好者可不因其勢以為之利乎互市之害其始在於欲得賦稅而無久遠之慮其繼在於兵敗氣餒志欲和戎而不暇為思患之計西洋諸國通商賦稅皆其國主因其緩急而定之或輕稅以廣其來或重稅而阻其至未有一成不易而權反操之客者也今誠能講求自強之法使輕重操縱在我自主則外洋不能奪中國之利矣然行之數十年彼深謀至計所在必不肯從也若東粵之肇慶西粵之桂林彼既求通市則今日之起而應之者宜深長思也中國之磁器茶葉與絲外洋仿為之則洋絨洋布諸物官府亦可仿為之以奪其利權官府不暇可檄富商賈人為之而責其必成也印度之絲與茶日新月盛則中國之絲之茶不可不講求種植之精良法以警吾民而廣招徠也泰西貨物日益精巧以誘吾民而吾民惟知苟且速效器日苦窳是官府之責也外洋之輪船入吾土者日有至焉而吾船之往之者不聞隻輪一帆可謂無才海濱大賈揚帆瀛海昔之所有今何歇絕也則製船而往市不可緩也中國書籍日流外洋而遠方記載知者益寡非所以用夷長策也則講求秘籍置寫書之官設重譯之人不可少也海濱之民趨利海國百有餘萬類皆貧苦無告或賣身為傭及其歸也富者金錢千萬少者亦累百未有徒手者天或者以此償鴉片之糜金錢乎則所以保護而勸之往者宜有實策也且皆吾赤子不忘中國習彼風土知敵情偽大可用也夫能酌生民百貨之盈虛通平準均輸之精意無事則收賦以利國通商以利民慎邊守精器械以防患有事則制其死命而撻伐之而孔子順之說賈長沙之計可次第行也則互市者馭夷之道中國之利也

通商宜誠實不欺論

昔孔子為魯司寇攝行相事與聞國政三月而鬻羔豚者弗飾大聖人德感化神自非尋常可比而市僧之貪詐善欺自古為昭於今為烈矣僕小人也而居又近市日用飲食米鹽醬醋之微雖未瑣瑣躬親而耳目之所見聞猶堪覆述之嘗有鄉民負薪求售每權輕重而陰以手拽之則得價可多此一事也籠雞鴨入市者往往預先強喂使飽脹塞而斃此亦飲羊之類也然猶可曰鄉愚無知不足深責也乃魚目混珠之肆滔滔皆是恬不知非而樂店偽藥飲人油坊攪賣花生油者甚至傷人性命尤為可惡然猶可曰非正經大店也乃次貨冒牌之事倒閉虧逃之案層見疊出大盜不操戈矛何以異是然猶可曰非字號交易也乃茶商焙製綠茶每用銅綠魚胆但希色味之佳絲斤棉花打包之時間有攪水圖重

斤兩者又有收買茶館泡過茶葉做還魂茶者洋商受虧不知凡幾近年嚴加釐剔格外小心而狡獪之徒藉口貨樣不符退盤減價時有所聞以致絲茶之利遠不如前而茶商獨多虧累此皆昧於信義通商不以誠實不欺為本之流弊也僕聞洋商之來華貿易也排場闊綽第宅崇闓貨物山積來往繁多盈千累物駭人聽聞在不知者鮮不以為挾重資而來而其實不名一錢也不過其人品行端方誠實可靠為人所共信耳各洋行中必延華人為買辦西語謂之曰康白度即吾華之檔手也與店號之經手官署之帳房帶肚子之門丁無異為買辦者皆需墊有銀兩多則十餘萬少亦不下數千而殷實保人繕具保單保賠之銀數不與焉一切用支應及辦貨價雜費悉取諸買辦無虞不給尚何憂於籌措乎華商買洋貨者必帶現銀出貨或五日期莊票其刊有滙劃字樣者不收洋行收買土貨則不然先行交貨約期負銀極早亦俟至禮拜六方允照付遲速懸殊一何甚哉老於市面者亦可從此恍然於其故矣蓋洋行收買土貨成交之後該行即核計貨價用錢關稅水脚滙費行用共數若干總開一單交銀行買滙票而支現銀以便轉付各貨主另開一單函寄外洋之收貨者照單備齊銀兩向銀行出貨而銀行定章必俟貨物運上輪船出口方照滙票付給此洋行買貨付銀之大畧也華商向洋行出貨必付現銀或付莊票者亦因外洋寄來之貨與由中國寄番之貨情形一律皆已先買銀行滙票而來若不先付現銀則提貨棧單均在銀行銀行銀未收清不還棧單憑何提貨此又向洋行付錢出貨之大畧也著名大洋行雖能自出棧單不由銀行轉手特因進出浩大繁瑣異常銀行相與往來立簿為憑滙票到期據以登帳耳仍不能出此範圍也此外與銀行並無來往者必先照付滙票方給提貨棧單矣待問哉惟寄貨向銀行買滙票之事西人誠實故行而無弊耳華人則防不勝防銀行於買滙票之貨僅憑該行清單開報從不遣人查視而滙票到期亦從無不付銀出貨之事使華商為之則夾以偽物甚至實土石於貨箱中而照付滙票必視貨價之漲落為衡安能日久見信乎由是言之洋行大抵借水行舟以誠實二字為本而獲利無窮人我均受其益華商不乏明識之士試一思之以為何如

中人與西人貿易宜先習西語說

自中西互市以來中人之與西人交接者言語不通不能不有藉於中間介紹之人於是在官場則有繙譯在市肆則有通事考繙譯一官於古為象胥之職寄以和親隸之司寇又戴禮東方曰寄南方曰象西方曰狄靚北方曰譯皆通言之官也蓋以宣朝命達遠情而使中外無隔閡之患故其官雖不甚貴而其責頗不甚輕若通事則於古無徵雖因時制宜

未始不可於世俗所稱三百六十行外另增一業竊嘗默覽時勢究極商情則以為目前繙譯必不能無而通事則必不可有何哉繙譯多在官員其所職掌大而兩國和戰之事細而地方交涉之端莫不確有關係且當其任者瞻懷國是顧惜功名究竟君子多而小人少然而真能識時務明大體者已屬罕見至於通事則不堪問也此輩多係市井無賴窮無所歸乃去而學泰西之語言畧識右行之體粗通吉利之文便已自號通材夜郎自大及其一朝得志則更喜氣揚揚目空一切但其胸中祇有金玉錦繡見解又皆來自田間素黨窘迫所謂措大食三斗猪脂即自謂窮奢極欲者西人知其然也嗶之以微利誘之以甘言於是傾吐肝腸知無不告見利忘義無所不為凡中國人情之強弱市面之情偽貨物之高下價值之貴賤在中國人有時而不盡知者西人則無不知之非西人之聰明絕世也有通事之傾筐傾篋而出之也且遇事無不抑中而伸西商人偶與爭論則曰是西人所分付吾不能主也一若君父之命尚不足以敵其尊奉之心者迨至若輩之身家飽而中國之市面壞矣且如漢口等處各茶棧所用通事號曰馬箭名不雅馴鄉黨自好者所不為而顧孱然趨之若鶩祇圖一己之用錢不問他人之虧本茶市疲敗半由於此觀本報所登四明若痴主人茶務揭要議內痛論馬箭之弊令人髮指皆裂以此類推通事之可用不可用亦顯然矣然則若之何而可也曰凡與西人貿易者無不習西人語言而後可查泰西人之經營商務者無不學習各國語言如商於俄則習俄語商於德則習德語此乃歐美之通例獨至中國則西人皆反客為主而我反俯就之此其所以敝也縱不能強西人以學我中國之語可令華商學習西語以敵之將來可以與西人當面交易不必更賴通事商人各顧身家不比通事祇賺用錢而於商務若素人視越人之肥瘠想必能稍有把握盡去上下其手同扶抑勒之弊語雖迂遠實係切要之圖特其效在十年二十年之外非深識者莫能喻也且以近事証之日本維新之際初與泰西互市其弊正與中國今日相同既而大悟凡貿易中人盡習泰西語言弊遂革又於本埠郊外設立貿易研究所顧名思義命意可想所中生徒八十人總其事者為荒尾君當招余往遊規模雖不甚大而條例甚精生徒半讀中國書以備與中國貿易之用半讀英國書以備與泰西各國貿易之用數年來聞成材者已不少矣夫中外往來開千古未有之局而商務實為第一關鍵自非習彼語言知彼情偽何以制勝若通事等人雖解西語然非身處局中不知利害則又不如不解西語之為妙此其損益得失之間差以毫釐謬以千里苟有智者必能明辨之也方今如劉峴帥張香帥諸鉅公皆勵精圖治銳意西法於水師學堂之外又創立自強學堂以方言與商務並列訂謨碩畫卓絕當時顧區區之見格致算學皆須從方言入手而商務為尤要似宜以方言為綱商務為目庶

中國市面蒸蒸日上將來兼可遠涉重洋自與泰西各國貿易與之並駕齊驅而不致受制於人斯則中國商務之福也竊不自揆縱論及此亦聊付於愚者千慮必有一得云爾

通商宜設立商部以濬利源

太史公曰農而食之虞而出之工而成之商而通之此甯有政教發徵期會哉人各任其能竭其力以得所欲故物賤之徵貴賤之徵賤各勸其業樂其事若水之趨下日夜無休時不召而自來不求而民出之周書曰農不出則乏其食工不出則乏其事商不出則三寶絕虞不出則財匱少財匱少而山澤不開矣此四者民所衣食之原也原大則饒原小則鮮上則富國下則務家貧富之道莫之予奪而巧者有餘拙者不足觀貨殖列傳序而後知通商乃經國之要圖不可不視為身心性命所關也中國自古以來重農務本賤商抑末方以為天子有道守在四夷通商則羈縻外國之術耳且天子不言有無烏有膺圖受籙之君而孳孳財利同於盜跖者哉道光之季年海疆事起中外諸臣不能折衝禦侮黃爵滋首發難端林文忠操之過急而者善英經伊里布琦英輩類以庸劣膺長子丈人之任遂至一敗塗地不可收拾維時猶以講求洋務為耻情多隔膜動受欺勝迄今泰西諸邦享受和約無窮之利事事盡佔便宜雖曰城下之盟急何能擇而始作俑者其能不遭千載之唾罵哉昔者管子相齊善因敗以為功姚崇擢入中書人號救時之相且困極而亨窮久則變天道循環之理也泰西以全力保商遂能馴致富強彰彰可考而其長技良法不自珍祕輒聽人之摹仿此亦足以見歐美諸洲人性之質直矣而近代柄政諸鉅公惟以講求軍制兵法製造軍火為亟如福州船政局上海製造機器局金陵洋砲局天津武備學堂軍械所等處仿造軍艦槍砲樂彈測量遠近推算重力壓力速率之法曾襲倭惠敏公著有中國先睡後醒之論亦指中國修明武備仿用西法槍砲及創立海軍等大政而言而咸置商務為緩圖於西人保護商人講究商務之道全不詳加體會且多置釐卡以擾累之官商之性不通上下之分太隔腠劑滋甚而商賈多失業之人熟於趨避者遂有戢用洋單挂洋行招牌情事噫商人惟利是圖是其本等而為叢毆雀為淵魚誰之過歟凡此數端皆不重商之咎也誠能幡然悔悟勿自封其步悉屏浮議設立商部衙門以親王大臣總領其事特示崇重之意各省均置督辦商務之大員以一事權或即令藩司兼管各府州縣以相其地之所宜而置官以倡率之全照西人章程而一以保護商人為主商務之隆可計日而待矣商務既興則鐵路礦產機造諸項自次第舉行商人殷富國勢亦與之俱興不必以講兵為強而兵自足以無敵於天下蓋兵之強弱視乎餉項之盈絀餉項之盈絀全視乎商民之貧富故曰倉廩實而知

禮節衣食足而知榮辱禮生於有而廢於無故君子富則好其德小人富以適其力淵深而魚生焉山深而獸往焉人富而仁義生焉富者之得勢益彰失勢則客無所之以而不樂天下熙熙皆為利來天下攘攘皆為利往太史公貨殖傳真經國之要圖也

論海關改章

各省道員之缺至肥至美莫如海關鑄營者以是專心致志不惜苞苴奔競苟能一旦到手則此生吃着不盡矣查海關缺最上者厥維江海關次則鳳凰城之東邊道津門之海關道皆歲入甚豐為數則每年二三十萬兩不等報解大郡不過十之三四蓋定例包徵包解入者多而解數少大可飽厥私囊也現聞此次計臣籌餉無微不至早知各關道包解之弊大妨國課擬陳大廷將各海關之包徵包解者通改為儘徵儘解矣俟定議後一律行知各直省照辦但興一利必有一弊未卜能不病於國不病於商否前據天津友來函披閱之下不禁為海關之懼改章者徒切杞憂並為管關之日望改章者代致欣幸焉嘗閱邸抄張家口監督每歲差滿回京循例奏云張家口應徵正額二萬四兩二錢四分盈餘四萬五百五十六兩七錢六分二共銀六萬五百六十一兩今自奴才接任之日起至某月日止一年期滿共征銀三萬九千二百六十四兩三錢五分除正額二萬四兩二錢四分徵足外計盈餘僅有一萬九千二百六十四兩一錢一分尚短征二萬一千二百九十六兩六錢五分實係事出有因非敢稽征不力查張家口上年短徵盈餘銀兩部議減去四成五釐八毫奏奉 旨允准今屆商貨微細牲畜稀少情形較之上屆尤為吃重惟有援例仰懇 天恩敕部核復從寬減成遵限賠繳等語所奇者每年短收銀數不相上下耳又歷仁廣西巡撫有梧潯兩廠應徵銀兩實難如額援案減成賠解以昭核實之摺內稱梧潯兩府應徵盈餘銀兩前撫臣將徵收短絀實在情形分別核定著賠成數具奏奉 批允准並部咨按三年限期梧潯兩廠照四成海關照一成完解今又屆三年與藩司督飭兩府正署各員設法稽徵原期改稅漸旺規復舊額無如商稀稅淡徵收更不如前當此度支竭蹶之時抽釐方斯漸裕徵解豈容少寬而歷屆相因每况愈下茲據該府等先後具稟由司核明兩廠徵數相符並無隱漏朦混詳請具奏前來覆核委屬真情惟有仰懇 天恩俯准援照原奏減成著解一俟將來商貨盛行徵收豐旺再行復奏請復額云云此皆包徵包解之關稅短絀大受其累者也較之關稅豐盈飽入私囊者判若霄壤殊有苦樂不均之歎焉馬玉山中丞嘗因梧潯兩廠上奏云若不問是否有徵使事督責勒完必致廉吏枉遭慘酷不肖者多方浮收仍如昔年之為累商民實與用人理財之道兩失其宜張中丞聯桂推

為至當不易之論且云裕課必先恤商一味嚴核苛求不惟與稅課毫無裨益轉恐商力愈困裹足不前勢必推入愈稀短絀愈甚此所以不敢操切以圖也其體恤下情曲當事理之處可謂後先輝映矣竊惟國家歲入有常錢糧之外以關稅為大宗而釐金亦資挹注原不容稍形短絀致滋侵蝕乃自包徵包解之例行如粵海福建等處每年可餘數十百萬甚至以一門丁而獲數十萬尤足駭人聽聞然此等優肥之缺皆以旗員任之而漢人弗與焉畛域攸分顯乖正值蕩平之政非王者一視同仁之意也自通商以後洋單盛行稅務情形大有滄桑之變而取盈之弊遂萃於包徵包解之關管關之員每以為苦究竟缺分尚優無須規避惟較從前出息稍遜而已通商各關或用西人權稅儘徵儘解毫無私弊公家之得益轉鉅胡不仿而行之良法具存乃甘受包徵之累乎即釐卡所定比較之法雖為籌款起見其弊適與包徵相等蓋多收實貪天之功短收則無辜受累取盈之非孟子之時已割切言之及至徵不及額責令減成賠繳有名無實徒成具文終當虧及國帑耳頃見西報載天津鈔關書金缺底約有四十餘分缺底值銀數十萬之多其平日排場闊綽無異富貴豪商茲聞津關稅務有暫由洋人包辦交銀三十萬兩之說並戶部刻已議准不日即可施行該關書辦一聞此信憂慮特甚徒喚奈何詳見關事談新一則中此事如果實在則海關改章一事必能見諸實事也行見國家大收裕國之效而庫帑充盈管關之員又不至以賠成受累一洗包徵之弊何快如之惟關差素優之缺不禁憂形於色耳雖然公忠體國竭誠奉上者當不若是

互市檔案

國朝康熙二十二年滅鄭氏臺灣平越二年疆臣開海禁報可於是設樵關四在於粵東之澳門福建之漳州府浙江之寧波府江南之雲臺山時荷蘭以助攻鄭氏有功首請通市大西洋素稱饒沃又其人勤於貿易多操海舶為生涯自荷蘭得請則以前之未通中國者皆爭趨之英吉利者大西洋之強國也自明以來拓地漸廣開通市埠及於東南洋當康熙之初即謀通商於澳門以海禁未開而止九年鄭成功之子經踞臺灣英商來往於廈門臺灣等處凡數歲鄭減其稅而羈縻之藉以控制荷蘭未幾耿鄭交兵藩臣內亂朝廷議先定沿海邊界防外洋之助鄭為患者於是英人以華商交易不便復去之及臺灣隸入大清版圖其人又疑新拓之區稅必加重乃舍閩赴粵東又時來往於浙之舟山寧波等處而此時英吉利之名不著但知其為紅毛之番族而已五十六年總兵陳昂始奏稱粵東紅毛有英主黎諸國最為奸宄蓋其時通市於廣州澳門等處每以粵關索費太重糾洋商合詞爭之雍正之初又議增收禮物銀兩乃於七年合

詞控於大府得稍稍裁減未幾官吏又增出口之稅於是英人始有移市入浙之志矣初浙之海關設於甯波舟山尚未設縣商船出入甯波往還百數十里水急礁多往往回帆徑去迨定海既設監督張聖詔始請移海關於定海部議從之乃於定海城外道頭街之西特建紅毛館一區以為番舶來往之逆旅自是浙之定海商船日多其時以粵中不便數來往舟山見今昔情形之異乃定計爭之乾隆二十年英舟泊定海港有總商喀喇生通事洪任輝請於浙之甯紹道台顧在定海納餉許運貨至甯波府閩粵兩督聞之以其利浙稅之輕而致關課之絀也二十二年閩粵總督上言浙關正稅請視粵關則酌加增一倍部議從之奉 旨洋船向收廣東口由粵海關稽察徵稅浙省甯波不過偶一至今奸牙勾結漁利至甯波者甚多番舶雲集日久留住又成一粵之澳門矣今更定章視粵稍重俾洋商無所利而不來以示限制意初不在增稅也未幾部臣復議外洋不准赴浙貿易定制歸併粵東一港每年夏秋之交由虎門入口是時方嚴絲劬網緼出洋之禁英吉利雖時時違制潛赴甯波無所得仍遵新制在粵通市粵中初設洋商通事洋行據為龍斷之利誅求不已串通官吏規費益增於是英商洪任輝等仍赴浙請在甯波開港而浙撫已奉新令悉毀英商旅解聞其舟泊舟山遂發令馳逐斷其岸上接濟之食物洪任輝憤甚乃由舟山泛海直抵天津仍乞通市甯波並許粵關積年規弊奉 旨詰責飭將洪任輝由旱道押赴廣東遂於二十四年七月奉 旨著福州將軍以欽差赴粵按驗苛勒有狀將監督家人問罪又因洪任輝不應違制擅赴天津押往澳門圈禁三年始釋之自此諸番通市粵中奉法惟謹乃事閱三十年弊端復起向之裁改歸公者又增其費而加重焉各洋商皆以為不便而德洪任輝之往事未敢訟言英國王雅治乃與其臣下謀議以純廟八旬萬壽入貢天津乘間言之五十八年英國王遣其使臣馬甘尼一作馬尼由海道赴天津入貢始通中國也時 上以遠人嚮慕誠款可嘉特命理藩院導其入覲嗣使臣以其國王表文進仍請在浙開港並通市天津又欲援俄羅斯往例遣人寄住京師 上以甯波天津無通事洋行交易未便且俄羅斯自立恰克圖後久不在京寄寓所請給舟山海島並廣東附近省城地華洋參錯斷不可行因 特頒敕諭前後二道逐款指駁示以中外之防使臣乃不敢言比其返也 上遣重臣伴送由內地經歷直隸山東江蘇安徽浙江福建至粵東出洋回國其舟過甯波請便道市茶絲出洋許之馬甘尼回國國王開讀 敕諭自知所請與中國體制不符事遂寢然雖絕意於舟山猶思逞志於澳門又其時英人方與佛蘭西構兵懼其播聞於中國因 敕諭中有許其再來款貢之語乃於六十年復具書幣由粵之大班轉呈粵撫代為陳 奏並述其昔年曾帶兵船至粵密地方助 天朝大將軍蓋福康安征廓爾喀時事也粵撫

粵撫譯其文以其詞極恭順 上亦優答之然其來往澳中既忌葡人又防佛蘭西展轉包藏遂有嘉慶二年十三年之事七年澳門者各洋貿易來往之所聚而葡人實主之乾隆間定制並歸粵東轄泊黃埔交市事竣仍回澳門住冬轉向葡人賃屋棲止限滿則驅之歸國又葡人但輸船鈔不似諸番船貨並稅英人自通市於粵設四班公司經理貿易欲得中國一島之地如新嘉坡麻六甲者以為逆旅其至便無過澳門而為葡人所先已憤不能平又見澳中官吏與之為援尤陰忌之迨乾隆之末入貢要求請令澳門之洋商待出入自便意欲效葡人事例得以輕賦自立馬頭而未敢訟言上亦陰相制馭故 敕諭中但令其供向來澳門貿易之常例而英人窺之不已嘉慶七年英有兵船六泊雞頸洋託言佛蘭西欲侵澳門故遣兵來成實藉詞窺澳也葡人覺之乃告於大府飭洋商宣諭令其釋兵回國遂以是年六月去之之日命人陳謝仍以佛蘭西為言時粵中大吏以其在澳未久又不煩兵力遂秘之而其事已浸聞於上迨十年英國主復具方物遣使臣附商舶來粵譯其表文則以方與佛蘭西構衅恐其播謠於中國以問我蓋自說其七年之役也是時英商每有貨船輒以兵力防護之又恐疑其復有澳門之事值閩粵之間海氛不靖乃託以協剿海盜游奕內洋 上見其表文中有欲為中國効力之語諭新任總督那彥成至粵整飭戎備其護貨之兵船亦令申劃疆界毋使侵踰越二年而粵中費起十三年英將有度路利者圖自安南敗歸以其餘艘抵澳亦聲稱佛蘭西取小呂宋將順道襲澳門葡人知其詐而粵之大班有喇佛者以七年之役為澳夷所間挫敗而歸欲以此時兵力唆令度路利占澳門為補牢計大府聞之即飭諭洋商傳諭大班令遣兵船回且告曰澳門非葡人所有乃我大清土地也爾焉敢侵軼我且邊寇有警中國自能禦之母勞戍師致吾民驚疑度路利聞之怒乃率兵登岸占路市樓澳門之民驚恐罷市時兩廣總督吳熊光粵撫孫玉庭聞變乃援照違抗封艙之案調兵守禦度路利遂率兵船三徑駛入虎門進泊黃埔又自黃埔乘杉板船數十艘直抵會城入館寄寓揚言將劫十三洋行以修怨度既下令兵船爭趨之乃有碣石鎮總兵黃飛鵬以師船橫截省河飛砲擊斃西兵一傷者三始懼而退然其踞洋面如故也時大班索還累年商欠又以封艙停市請退所買之茶而償其值虛聲恫喝勢益張適英吉利本國有船主來聞封艙之事對大班曰犯中國而罷市雖得澳門猶石田也先時洋船率以七月底粵停舶黃埔換貨不過兩月交冬即回帆去至是泊港外數月貨無起日各商亦怨謗沸騰大班喇佛乃言於度路利責葡人納賂以番洋六十萬犒師英之兵船始具狀歸誠請照舊開市維時方奉剿辦之諭旨各路官兵雲集者二千六百名而督撫意在弭兵遂許以兵退開艙於是度路利以冬月起程出洋蓋已有成約也 上

以吳熊光辦理遲緩又不親蒞澳門躍示兵威雖開船在西兵既退之後而許之在先嚴 旨切責旋飭新任督臣馳赴澳門查訪盡得其情因劾熊光示弱蕙狀遂與巡撫孫玉庭俱論罷遣有差是役也英人覬覦濠鏡自謂與 天朝無纖芥之嫌而度路利稱兵入省實由封船激成且其自安南來亦非該國王本意大班喇佛教唆其事聞於英國王遂革大班之職喇佛不敢歸復回粵粵中人以前事銜之驅逐回澳數年以憂死

自公司局之設也大班來粵者率寄寓洋行人事之惟謹然所以腴削之者無所不至又與關吏因緣為奸課稅既增則規費抽用亦增有取之十倍二十倍於前者十五年英之大班稟控粵撫謂各洋貿易資本皆自國幣借領不堪虧折請酌量裁減以利遠人粵撫韓封檄飭布政司核議久之竟寢不行當初行之時每兩奏抽三分以作洋行辛費繼而軍需出其中貢費出其中各商攤還西債亦出其中遂分為內用外用名目於是各洋利薄怨生屢思藉貢輸誠以希恩澤二十一年英國王復遣使臣分入粵東京師其至粵者曰加拉威禮方至粵輒爭謁見儀注以舊制貢使見制府將軍皆免冠俯伏大吏坐堂皇受之加拉威禮不可時粵督蔣攸銑方入 覲攝事者為董敷增許免拜伏僅免冠致敬大府亦離席立受之是時英之正貢使羅爾美副貢使馬禮遜已乘貢舟達天津夏六月 上遣大臣戶部尚書和世泰等賜宴使臣於天津有司諭以謝宴時應行跪叩禮不可將入都又告以乾隆二十八年該國使臣入覲儀注不答時 上在圓明園尚書和世泰等先期導使臣自通州起行一晝夜馳至御園車馬困頓而使臣衣裝輻重皆落後蓋惡其不肯循跪叩儀注欲以計尼之時使臣表未齋禮服不備倉皇失措遂以病辭而 睿廟已詰朝御殿傳呼和世泰始以正使病聞復 召見副使又不至 上怒其無禮命却其貢不納即日遣理藩院押回通州瀕行仍令援乾隆五十八年例由內地行走是役也使臣失禮實以衣車未至之故 上悔之廷臣始知當日理藩院近接不如儀乃遣和世泰酌收貢物數事仍頒 敕諭賜其國王珍玩以答遠忱驛交粵督蔣攸銑令慰遣之然英使本欲以粵東增規費事入告竟不得達快快而去大班之在粵也初寓洋行繼則立公局久留與中已不復循回澳往冬之例道光之初粵城外不戒於火民居多斥為平地英商欲廣其公局乃藉修葺為名以次侵占拓地數里而其地當對河民居渡口居民欲返其故地不得乃控於大府時大學士李鴻賓任兩廣總督實不理粵人謂其受洋商賄乃乘其入 覲之間控於粵撫朱桂楨朱在粵素有威望洋商憚之聞控震怒立鎖等通事下獄洋行懼誤開船事跪求免究乃親督拆毀平之英商之桀黠者以此事入稟要挾停止開船相持者半年仍以孟加喇新到之船主居中調停事遂解此道光七八年間事也初洋商在粵通市定制不

得携帶家屬自大班公司之設出入自便遂於八年秋有大班某挈一洋婦寄寓粵城而其時十三洋行中有東裕行司事謝某為置肩輿出入乘坐久之夜即自大翻不許行人乘轎入館大府廉得之立拏謝某究治瘦死獄中大班聞其事遂架大砲於洋館外設兵自衛大府慮激變乃令通事蔡剛以理曉諭令撤去兵砲並連遣洋婦回國於是洋行具稟託言大班患病需人乳為引俟稍愈當即遣之

大府據稟結案不復追根洋婦卒逗留不遣數年之後義律來粵竟以挈眷為援例之常而邊釁亦因之起矣

義律者某公司散後續到之大班也英人自開港於粵惟公司船許赴粵中貿易此外散商不得擅自出入著之令甲以二百年為限其公司大班亦定以三十年一瓜代所有貿易皆本悉領於國庫中歲收其息嗣因公司乾沒庫帑不能償又於十三年後復請展限滿則虧折如故英國主見其黨與日多駭駭乎不可制亟思設法解散之值道光十年後屈指例限將屆大清二百年之期所逐則解散必在十年以後十四年以前二百年者亦舉其大數而已遂乘機裁革前例解散公司之局聽散商各自牟利英之富商皆以為便而中國素惡公司橫甚不如散商之易於制馭惟十三洋行與公司交通既久狼狽為奸反以為不便乃託言公司散後統領無人因有再著大班來粵之請十四年盧坤調任兩廣總督奏請 敕令洋商寄信回國仍援前例派公司大班來粵督理貿易英國主得信即遣領事一人名律勞卑者以是年秋至澳由澳來粵大吏以其未經通報擅入省河慮非其國主所遣是時有御史奏稱律勞卑帶領兵船進至黃埔督紅牌出口云云蓋但其驅逐律勞卑之事而其時大班來粵實出自督臣所請核之十六年乃派員押回澳門其十六紀律至粵粵督奏聞奏中仍理前次督臣請寄信遣大班來粵之案是此時之驅逐有因也

年繼至者則義律也義律之來英人初議欲在粵中設立審判衙門專理各洋行交涉訟事不管貿易益欲仍聽散商自行經理然其時各洋行皆本首推英商而義律初至洋行尤謹事之遂以是年冬携一妻子來粵名為約束商人水手不督貿易實則總攝其事諸番之在粵者咸仰其鼻息不敢自樹異同十九年躉船之役義律主之時 欽差大臣查來辦粵餉令各洋行將躉船鴉片悉數繳消首傳義律不至嗣因各洋行稟復稽延拘其奸商顛地等義律適自澳門回則封船撤去沙文沙文即洋商買辦見後之令已下不得已始遵飭繳消而悻悻欲圖報復之意不已也義律寄信回國仍住澳門是年之秋各洋貨船來粵者皆遵諭停泊澳洋聽候中國委員查驗義律首發難端凡英之貨船悉配以兵船聚泊尖沙嘴不聽查驗制府發令驅逐三挫其鋒始駛出老萬山復行文照會索償煙價以為入粵配茶之需制府見其跋扈一面照覆責其不守臣節一面奏請停止英人貿易是時邊釁方起內外諸臣有請閉關封船並外洋各國一律停止通商上發

交粵督議奏林則徐上言罰不及中必須示以大公今以英人不遵法律遂將恭順之各國一例峻拒未免良莠不分設各國稟問何辜臣等即碍難批示且自英人貿易斷後他國頗欣欣向榮蓋逐利者喜彼絀而此贏懷忿者謂此榮而彼辱此中控馭之法正可使其相間相睦輸忱內向若概與之絕轉易聯成一氣昔人所謂彼則聚而協以謀我者不可不預為之防等因奉 旨如議然是時如彌利堅港脚等國之貨船雖奉准開船而英人以兵船攔阻口外不得入港二十年冬琦善以欽差赴粵方欲議撫許英人照舊通商而義律遽謀先戰後商遂有大角沙角之師粵撫奏自用兵以來開課短絀所到洋船已不及向來十分之二又被英人攔阻泊在港外守候開船遂遂無期時 上已授貝子奕山為靖逆將軍隆文楊芳為參贊大臣飭令到粵先查明各國情形果否怨恨英人阻撓生計抑稍有缺望於 天朝未能招徠撫綏以致向隅失業據實陳奏等因蓋 上意在懷柔遠人更欲使疆臣體察外情如其怨恨有因即可加意招徠供我指臂此近交遠攻之計也然其時各洋人以阻梗牽留輒思各帶兵船與之講論而我律餽以甘言謂撫事已有成議因之各洋人急欲開船反為英人作說客而大府不悟也二十一年二月英人闖入虎門攻破烏涌卡座時則港外之彌利堅佛蘭西及港脚等國貨船共四十餘艘銜尾而進於是彌利堅佛人首請開倉復陳明義律悔罪不敢別有要求但求與各國一律通商無不同聲欣感參贊楊芳據以入奏奉 旨嚴加切責而義律果不受撫遂有四月闖入省河之役當義律之請撫也一索煙價一欲得香港馬頭琦相以事關割地佯許之而未敢入奏然英人自謀奪濠鏡不得屢思於附近粵東省城乞一島一地以為定居蓋有早窺香港志矣迨聞相國許其入奏始則稱兵以要之繼則請繳還浙之定海及獻出二角砲臺以易之相國方欲請 旨定奪而英人已在香港出示起造房屋馬頭視為已有未幾將軍參贊至粵遂以六百萬及香港一島為城下之盟而義律之狡焉以逞遂於粵東始終之計曰誰生厲階至今為梗則公司之再設也粵東罷兵義律遂回英國不復來其稱兵於閩浙江蘇以要通商之各海口者曰濮鼎查曰郭士利連兵二載擾及三省由海入江而白門之撫議再起二十二年秋英人泊下關將攻江甯欽使制府聯銜請撫首定五口通商之約五口者粵之廣州閩之福州廈門浙之甯波江蘇之上海也初英人以粵東關稅之重屢請在浙開船然其本意亦祇欲在舟山建立馬頭運貨至甯波不敢遽希腹內地也二十年英將伯麥占踞定海即欲在定海通商然自粵東再犯已踞定海為老巢請 飭諭粵東欽差大臣計出萬全慎重妥辦必不可准英人在定海通商然自粵東再犯已踞定海為老巢遂將城垣拆毀建造洋樓綿亘數里羣眷居住見浙撫致白三帥函中自謂足償其夙願不復他求一旦逞志犯江挾兵要撫遂萌得步進

步之念況得甯波而踞之則定海一香港也上海則吳淞為之屏障築海塘高岸以蔽之一旦入寶山之郭扼黃埔之口浸浸乎堂奧矣開港之請 上以福州關係省會飭令給泉州而濮馬等

馬即馬利

堅持前約三帥不敢與之爭遂定議

當粵東初開船時定制洋商換貨之後諸領牌回至澳門住冬不得逗留在省挈眷寄居亦不得於城內設立貨棧及洋

商擅自入城迨白馬之役濮馬等意在弛禁遂於約內載明五口通商准設正副領事官管理貿易皆得挈眷居住又海

口賃屋買地以及起造禮拜堂醫院墳塋之類悉聽其便領事官遇有相商事件隨時往來悉聽入城與地方官衙署相

見大府但以通商二字完案不復援挈眷入城之舊檔例禁與之詰難自此五口通行悉與澳門香港無異矣是役也彌

利堅人不與佛蘭西亦後至焉續聞通商事定相國者英任兩廣總督赴粵陳請悉援英人例許之惟俄羅斯者舊制在

黑龍江設立恰克圖但許其在陸路通市不准由海道入粵迨五口禁開遂於二十七八年間闖入粵東及江蘇之吳淞

口雖臺經督院查明駁回而陽奉陰違率附英彌海船出沒於五口間關吏不敢詰此白門議撫通商之大略也

方英人之要撫於粵也粵之紳民獨忌之通賂款事定英人登岸出北門過蕭關三元里鄉民聚眾剗之義律幾不免

後詳

踰年白門議款時粵民方興團結之局與英人為不共之仇聞其條約內有領事官相商事件得於地方衙署相見以為

將破昔年入城之禁益洶洶不可止踰年夏濮鼎查至粵先期通刺制府期以入城相見粵人聯名阻之濮遂去其後屢

請入城不許二十九年己酉英丹闖入省河拔兵請入城粵人集團練為制府聲援英之公使文翰知眾怒不可犯乃請

罷入城之約復開船通市如初咸豐六年英人以白門前約所定稅則一款原議百中取五近年貨值漸減稅額不符擬

請重定並欲援白門前約得與制府相商署中時葉相國名琛任兩廣總督奉 旨授為欽差大臣粵人乃持其二十九

年之約而爭之維時英人在粵方以中國執其丹子起釁於是公使水師提督及領事已夏禮等挾兵以要我是年九月

英人攻城不克遂襲沿河砲臺粵民憤甚乃悉毀城外十三洋行英人不勝乃歸告國王請調派兵船別遣重使至粵並

西人月報作換爾

約法蘭西為助七年英公使額羅金來粵

聞至粵於是英人以所請不行轉相號召遂起合從之師十二月英法進兵攻粵城陷之執制相繫舟中歸之於國八年

四國遣兵由上海徑赴天津遂有是年四月大沽之役

後與

既罷兵俄彌二國復以撫事請奉 旨飭大學士桂良吏

部尚書花沙納馳赴天津查辦久之不決而英人挾兵要盟擅擬天津新議凡五十六款即請換約奏聞 上謂稅則之

款必須親歷海口相度地宜爰降 旨飭四國使臣前詣上海仍命桂良等馳驛同往是年八月欽使及四國使臣先後

到滬於是英人持其所定天津新議中凡交涉通商事務者定為稅則善後條約將近年出口入口之貨仍照百中取五按時值估計載明納稅定數議十年一修改時直洋藥上稅定每百餉納海口稅三十兩欽使等復與三國議專條載入滬約第五款與天津新議之第九款二十八款無涉見後議定桂相奏請令該三國赴都換約遂有九年不遵原議闖入大沽之役英師既敗惟彌人以恭順准其換約而歸然並天津新議亦中寢矣時西人以天津新議業已奏准遂刊入通書中此天津再議通商之略也

十年英人以換約不果又懲大沽水師之創歸募湖勇將由天津登岸內犯京師夏六月英法連兵入寇天津僧王格林沁帥兵禦於大沽口七月初五日西兵自北塘後路襲我大沽北岸之砲臺初七日遂陷天津僧王退守通州西兵由河務張家灣一帶進襲通州王執英酋巴夏禮繫之京師八月初七日西兵自通州入寇都統勝保率禁兵禦於齊化門外我師敗績越日 上啟驛狩於灤陽恭親王奕訢奉 旨留守京師二十二日西兵襲海定恭王退駐彰義門外四十里

西兵直薄安定門聲言攻城駐京大臣等請釋巴夏禮議撫西人許諾二十九日大開安定門館西酋於國才監天主堂等處尋奉 行在硃諭飭恭王入城速定和議遂於九月十一十二十七等日與英法俄三國先後交換和約英則巴夏

禮主之於天津新議五十六款外增八九條法俄亦有續增之款又於前案通商各海口增入天津淡水等處其稅則專款定自滬中者曰通商善後條約凡十款內載各國進出口之貨皆有一定稅則議以十年一換改以上各議均奉

上諭頒行各省督撫大吏一體按照辦理英法乃罷兵退駐天津此續議通商及天津前議得旨允行之張本也

撫議既成英人欲逞志各省以專通商之利尋據其酋卜魯士照會換約之王大臣內稱八年所定條約內載奉天即海

一等處皆准通商欲派領事官前往駐紮並稱第十款所載長江一帶擬於九江漢口兩處先行開商請咨湖北江西各

大吏一體查照遵辦等因於是恭王奕訢等奏請籌辦通商善後章程並請設立總理各國事務衙門及欽派各口通商大臣十二月初一日奉 上諭京師設立總理各國通商事務衙門著即派恭親王奕訢大學士桂良戶部左侍郎文祥

管理並命禮部頒給欽命總理各國通商事務關防應設司員即於內閣部院軍機處各司員章京內滿漢各員挑取八員即作為定額輪班辦事侍郎銜候補京堂崇厚著為辦理三口通商大臣駐紮天津管理牛莊天津登州三口通商事務會同各將軍督撫府尹辦理並頒給辦理三口通商大臣關防其廣州福州廈門甯波上海及內江三口並潮州瓊州臺灣淡水各口通商事務著署理欽差大臣江蘇巡撫薛煥辦理新立口岸牛莊一口仍歸山海關監督經管外其餘登

州各口著各該督撫會同崇厚薛煥派員經理所有各國照會及一切通商事務宜隨時奏繳並將原照會一並呈覽一面咨行禮部轉咨總理衙門查照其吉林黑龍江中外邊界事件並著各該將軍等據實陳奏一面知照禮部轉咨總理衙門不准稍有隱飾欽此按此皆據王大臣撫定章程六條內開各事宜照議允准尋據恭王等又酌定新設衙門章程十條具奏奉 旨均着照所擬行欽此此京師新設總理各國事務衙門及各口設立通商大臣之檔案也

以上所輯前半據海國圖志所采粵中舊檔參以西人所撰華英通商事畧自十九年邊釁以後則皆得之聞見者蓋自康熙開海禁以來二百年互市之消長變遷令人不可思議於是論者皆謂中西之釁自燒煙啟之今載考前後乃知釁端之原於互市而非起於鴉片也夫互市者實中西交爭之利而關吏牙僧必欲專之外洋因利而得害乃思以害貽中國而陰收其利善夫范蔚宗之言曰匈奴貪尚關市嗜漢財物漢亦通關市不絕以中之此威世柔遠之術知者知務之言中之云者中其求利之欲耳梯航萬里遠涉風波得利則欣失利則戚人情之常何足為怪一自貪吏侵漁奸商培植克彼以求利而來終於失利而返能無怨謗沸騰耶明之倭禍始於中官繼以商僧終於豪貴於是外番之怨日深而中國官民亦交困矣

國初海禁既開設關有四江浙閩粵無不可通乃未幾而粵東海關專其利數未幾而十三洋行操其利權稅有定則未幾而益以規費支銷名目未幾而益以歸公充餉名目始則取之在吏繼則取之在官如據澳門月報言洋行抽用定例不得過三分今據嘉慶年間大班稟控之詞言棉花一石價值八兩向例行用二錢四分運稅銀不過四錢據此則初定稅則每兩不過二分其後每石行用加至二錢幾十倍之矣又言茶稅餉二兩五錢之外洋行會館每石抽洋六圓至九圓不等計茶葉出口之稅不過二四倍於八兩一石之棉花而稅用兩行已虧折其十之三則增設名目之漸也洋商不堪其恣索則控於地方官地方官不能平其訟則控於大府大府不能窮其獄乃回訴於本國於是帶兵船講論而干戈之端以起書曰若顛木之有由蘖語曰物必自腐也而後蟲生焉由是言之即使鴉片不入中國亦未能保外洋之終於安靖而隱惡也且鴉片之來亦為貨物之虧折起見耳貨物不得其利乃思取違禁之物以償之若使稅用不增通人可得彼又何樂乎以違禁之煙土而予關吏以把持啖水師之賄賂哉愚謂當日欲與之申明煙禁必先取中西互市之至局通盤打算平其百貨之稅則行用更擇其胥僮之尤者而懲之必使番人憬然於生計之盈絀不在鴉片之有無但使關稅行用之積蠹漸除則湖絲茶黃之轉輸自便此為中外一體咸福並行制敵撫敵之策似無踰於